

Thursday, March 27, 2025

Time - 2:30pm - 2:35pm

REGIONAL NEWS BULLETIN

(MIDDAY)

CM

Chief Minister Pu Lalduhoma chuan thalai thi tam lutuk chu titem turin theihtawp chhuah a tul thu leh chhungkua atanga bul tan a pawimawh thu a sawi.

Vawiina Aizawla Assembly Annexe Conference Hall-a Former Legislators' Association of Mizoram (FLAM) General Body Meeting a hmanpuinaah he thu hi sawiin Chief Minister chuan a lo zir chian tawhah a tlangpuiin nula pakhat an thihin tlangval 7 thi zel ang vel a ni a ti a. Thalai leh pavalai thlan a tam hle tih sawiin hmeithai la valai tak tak, eizawna mumal nei si lo an tam a. Heng hi theihtawp chhuaha do tlan a tul tih sawiin a bul chu chhungkua ni a a hriat thu a sawi a ni.

Chief Minister chuan Mizoramah project hrang hrang laktlak loha chhuak a tam thu leh a hlui chu tih hleihtheih a nih tawh loh thu a sawi a. Project reng reng laktlak loha chhuak lo turin tun atanga tan lak a tul avangin sorkarin hmasawna hnathawh hrang hrang viltu tur Mizoram State Project Monitoring Committee a siam a ti a. Sorkar lai atang pawhin member pakhat chauh dah a nih thu leh a bak chu party leh hmun hrang hrang atangin, vawiina hun a hman pui FLAM atang ngei pawhin mi pakhat ruat tel a nih thu a sawi a ni.

Chief Minister chuan FLAM member te chu tunlai thiamna sang tawh takah tar A ni lo tura fuihin kawng hrang hrang inveng turin a fuih a. State danga damlohna thila inenkawlina tum sak an ni thin chung a zin veivahna pek ni ngai lo chu, tunhnaiah an zin veivahna senso pek tawh tura tih a nih thu a sawi a. Circular awm mek zawm that loh, FLAM member te an zin nikhuua airport leh Mizoram house inkara an thlen hlim leh an haw dawna hruai tur tih chu chak zawka kalpui a nih dawn thu a sawi baw a ni.

Ram hruaitu, MLA leh MP lo ni tawh te intelkhawm FLAM hi kumin 1994 a din niin kumin hi a kum 30-na a ni a, tunah hian FLAM member 117 leh Associate Member 59, an vaiin member 176 an awm mek a ni.



MP

Lok Sabha MP Pu Richard Vanlalmangaiha chuan nimin khan Chief of Air staff, Air Chief Marshal AP Singh chu Air Headquarters Office ah kawmin Mizo thalai te tana hamthatna awm thei te a sawipui.

Pu Richard Vanlalmangaiha chuan Air Force a Mizo thalai te tan hna awlsam zawka an dil ve theihna turin Mizoramah recruitment nei ve turin Air Chief Marshal hi a sawipui a. Air Chief Marshal hian Air Force Recruitment India ram hmun hrang hranga a neih thin chu Mizoram ah pawh neih ve ngei a nih theihna turin hma a lak tur thu a lo hrih a ni.

Lok Sabha MP chuan Indian Air Force in Mizoram hmun hrang hranga an hmunhma neih te civil miin tangkai taka an hman ve theihna turin changtlung taka siam turin a ngen a. Chhingchhip Sainik School a Jet Fighter Display dah ve turin Air Chief Marshal hi a sawipui bawk a ni.



CUSTOMARY LAW

Mizo Inneih, Inthen leh Rokhawmna Dan ennawntu Committee chu an Chairman, Law&Judicial Addl. Secretary Department Pu Zahmingthanga Ralte hovin Secretariat Conference Hall-ah an thukhawm a. MKHC, CYMA, MHIP, MUP, Women Commission. leh Mizoram BAR Association aiawhte bakah helam a tui mi leh mithiam bik te chu committee-ah hian an tel a ni.

He thutkhawmah hian Inthen leh a kaihhnawih hrang hrang naupang enkawltu tur te, inrem leh theih dan tur te, nupui fanau chawmna chungchang leh inthen thulh a Ro insem dan tur lai te ennawn a ni.

Chairman Pu Zahmingthanga Ralte chuan Inneih, Inthen leh Rokhawm chungchangah Kum 2014-a Mizoram Legislative Assembly-in Dan a pass chauh chu hman tawh tur a ni a ti a, nupui pasal inthen tur reng rengin Mizovin Inthen Dan kawng kan neih: Mak, Sumchhuah leh a dang te la hmang tho in Court hnai berah Inthenna lehkha lak tur a nih thusawiin, chung inthen dilnate chu Court-in thla ruk chungin a chingfel dawn a ni a ti.

Pu Zahmingthanga Ralte chuan tunlaiah Mizo nulate, hnam dang pasal nei eng emawzat Kohhran-in a lo Inkutsuih tir te an awm a. Hengte hian Mizo Inneih Inthenna leh Rokhawmna dan, 2014 hnuaiah Inneihna an kalpui thei lova, Dan chuan a huam lo a ti a. Mizoram-a Inneihna zawng zawng chu Supreme Court thupek angin Law &Judicial Department chuan Veng tin leh Khaw tina Registrar of Marriages kal tlangin a chhin chhiah vek a, Marriage Registration Certificate a pe thin tih tarlangin he Certificate hi Sawrkar leh Ram dang Sawrkar pawhin an pawm a nih avangin fimkhur taka kal pui a tul a. Mizo hmeichhia ten ram danga harsatna an tawh palh loh nan Inneih sawngbawl leh a Dan hman tur thua fimkhur taka ngaihtuahna hmang turin Mizo mipuite a chah a ni.

He thutkhawmah hian Member-ten siamthat ngai tia an lungrual theihna eng emawzat a awm a. he ennawn hna hi zawh fel thuai tum niin, Zawh fel a nih hunah Sawrkar-in tul a tih angin Legislative Assembly-ah Dan siamthat turin a la pu lut dawn a ni.



SWMC

Aizawl khawpui bawlhhlawh paihna hmun Solid Waste Management Center (SWMC) kang chu tukin khawvar velah khan thleh mih a ni.

AMC hotuten Akashvani zawhna chhangin kangmei chu zing khawvar vela thelh mih a nih thu leh mei a la khuk nasat thu an sawi a. Fimkhur thilah a hmun erawh an la khar a, an hawn thuai erawh an beisei thu an sawi a ni.

Thu leh awm hma chuan khar a nih tur thu AMC hotute chuan an sawi a. An thuchhuahah hian SWMC chu khar lailawk a nih thu leh hei hian PPP mode-a local council hrang hrang kaltlanga bawlhhlawh khawn leh mimal

bawlhhlawh paih a huam thu an sawi a. SWMC ah hian phalna nei lovin tumah luh phal a ni rih lo a, mipuite chu mahni inah tha taka an bawlhhlawh te lo khawl tha rih turin an ngen bawk a ni.

